



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

13. Kalenderwoche – ab 29. März 2009

Offreschd odor reschds?

Nee, das habb isch nisch gewussd, wie reschds isch bin! Ja, isch bin wahrscheinlich e Reschdor!
Daderbei habbsch eischendlich immor gedachd, dass isch e Offreschdor bin. Ehor mid eenor
leischdn Dendenz zur rode Sogge hin. Abor nu bin isch verwirrd!

Da is doch bei mir im Briefkasdn e blauor Fleior gewähsn, eene Ard Zeidung - hieß "Unsor Land"
von "Bro Gemnidz". Scheen bund. Vorne droff e Bild von dähm Schdadtrahd Gohlmann. Also, dähr
un annre von "Bro Gemnidz" hamm nu in dähm Fleior offgeschriem, wogeeshn se sinn un
wofiehr.

Isch dachde erschd, die kenn misch ma! Isch bin schließlich selbor bro Gemnidz - da brauch isch
die nisch dazu. Abor dann habbsch doch ma indressehalbor e bißl gelähsn un wahr dann sähr
vorwundord, dass isch das, was die nisch scheen findn, ooch nisch scheen finde. Also, jednfalls
einisches dadervon! Zum Beischbiel, dass wenn de Hunde ohne Leine rumrenn dun.

Na, is doch wahr - ooch wenn isch Hunde guhd leidn kann, wenn misch nu abor so e Hund nisch
leidn kann... was mach isch dann? Un ooch das Herrschn von so eim Hund weeß ja nisch, wähn sei
Hund leidn kann un wähn nisch. Guhd, die ganz kleen Hunde, die nisch greeßor wie e Garniggl
sinn, die missn villeischd nisch unbedingt an de Leine, abor die greeßoren... - nee, isch hab keene
Lusd, misch off dor Schdraße mid eim Hund rumzubalschn!

Un dann soll das effendliche Saufn vorbodn wern, so in de Barks un off Blädze un so. Naja, un
ooch hier du isch ähnlisch denkn - de Besoffnen sinn ja wie de Hunde - du weeßd nie, wann die

sisch offn Schwanz gedrähdn fiehln un wann se agresief wern. Erschd wennse werglisch ibor drei Bromille hamm, sinnse nodgedrung friedlisch. Un das mid dähm Wandbild... ährlisch - da hammse eefach reschd! Das is e scheenes Bild. Un weschens dähm Greiz off dor Margdhalle...? Herrje!

Naja, un dasses off dor Schauschbielbiehne manschma zugehn dud, wie im Schlachdhof un eim Schwingorglub zugleisch... - nee, die Mode dud mir ooch nisch gefallen. Wenn die das in Bärln so machn dun, missn mir das doch in unsror scheen Brovinz nisch eefach nachmachn! Die in Bärln hamm ehm ooch genuch ausgeflibbde Leide, dähnen das gefallen dud. Mir nisch!

Jednfalls had misch dähr blaue Fleior eschd vorwirrd. Bin isch werglisch e Reschdor, wenn isch geeschn freiloofende Hunde bin? Un warum sinn eischendlisch de Linkn dafiehr un nisch ooch dageeschn? Also, was de Hunde un dähn Algehohl bedreffn dud. Ooch hinsischdlisch dor Schauschbielorei... - musses denne werglisch immor Gammlfleesch sein, wasse off dor Biehne vorzeischn? Isch weeiß, dass vrom erschdn Weldkriesch in Wien aus Brodesd geeschn de herrschendn Vorhändnisse sogahr off de Biehne hingeschi...kaggd hamm. Das hammse uns erzähld, wo mir ma dord warn - midm Bus in Wien. Abor heidzudaache...? Odor machn die die Sauorein off dor Biehne ooch aus Brodesd? Un dann - wogeeschn? Un das Wandbild, was dor Schulbirschormeesdor nisch endhilln lassn will, das dud mir gefallen. Basda! Un bin isch nu werglisch e Reschdor?

Eduard Sachsenmeyer